

Paasissutissanik piniarnermut atatillugu inatsisitigut tunngavissaqarnissaq qularnaarumallugu, takuuk ilanngussaq 1 formatimi nassuiarneqareersumi, kingusinnerpaamik UPA2018-mi siunnersuummik saqqummiusseqqullugit, Naalakkersuisut peqquneqarnissaannik Inatsisartut aalajangiiffigisassaattut siunnersuut. Ilanngussaq 1-mi taaneqartut paasissutissat eqqarsaatigalugit Naalakkersuisut peqquneqarput tamanit iserfigineqarsinnaasumik nittartaglioqqullugit paasiuminartunik naatsorsoqqissaakkanik katersanik imalimmik, tassani soqutiginnittut meeqqat atuarfiat pillugu paasissutissanik naapertuuttunik aallarsinnaalersillugit. Naatsorsoqqissaakkanik katersivik suliarineqassaaq meeqqat atuarfii ataasiakkaat naleqqiunneqarsinnaanngorlugit, imatulli sanallugu inunntu ataasiakkaanut paasissutissat pissarsiariniarneqarsinnaajunnaarlugit.

(Inatsisartunut ilaasortaq Nivi Olsen, Demokraatit)

Akissuteqaat

(Ilinniartitaaneranut, Kultureqarnermut, Iisimatusarnermut Ilageeqarnermullu Naalakkersuisoq)

Siullermeerneqarnera

Naalakkersuisut Nivi Olsen, Demokraatit qutsavigaat - meeqqat atuarfianni paasissutissanik aallarsinnaalernissamut inatsisitigut tunngavissamik – nittartakkamik tamanit iserfigineqarsinnaasumik atoruminartumik naatsorsueqqissaarnermik atuiffiusinnaasumik pilersitsinissaq anguniarlugu - Naalakkersuisut inatsisissatut siunnersuummik saqqummiusseqqullugit siunnersuuteqarneranut.

Naalakkersuisut meeqqat atuarfianni paasissutissanik pissarsiniarsinnaanermut inatsisitigut tunngavissaq siunnersuutigineqartoq, ilaatigut atuarfik pillugu inatsisip § 36-ata immikkoortuata pingajuatigut pigereerpaat, tassanimi aalajangersarneqareerpoq kommunalbestyrelsip isumaginninnera nukittorsarniarlugu aamma nukinnik atorluaaneq sapinngisamik annertunerpaaq anguniarlugu Naalakkersuisut meeqqat atuarfianni ilisimasanik eqiterineq aamma siammarterineq isumagissagaat.

Taamaattumik Naalakkersuisut paasissutissanik assigiinngiiaartunik eqiterisareerput, tassungalu ilaapput alloriarfinni inaarutaasumillu misilitsinnerni angusarineqarsimasut, paasissutissallu taakkua Ilinniartitaaneranut Aqutsisoqarfiup nittartaagaani ukiorpaalunni takuneqarsinnaareernikuupput. Naalakkersuisut aamma kommuninut paasissutissanik qanoq ilusilikkanik nassiussisassanersut piumasaqarsinnaareerput tamannalu pisareerpoq atuarfiit Ilinniartitaaneranut Aqutsisoqarfimmut ukiumoortumik nalunaarutigisartagaanni. Soorunami nittartakkap maanna pigineqareersup – alloriarfinni misilitsinnernut tunngasunik inaarutaasumillu misilitsinnerni angusarineqartumik imallip- atoruminassusaa oqallisigineqarsinnaavoq – kisianni pioreerpoq.

Taassuma saniatigut atuarfiit pisussaapput ukiumoortumik pitsaassutsimut nalunaarusiortassallutik, tassanilu ilaatigut ilinniartitsisut atuartullu napparsimaneq peqqutigalugu takkutinngitsoortarneri allallu pillugit paasissutissiissutaasussaallutik. Tassunga atatillugu Ilinniartitaanermut Aqutsisoqarfik kommunit suleqatigalugit atuarfiit pitsaassutsimut nalunaarusiaasa ilusissaannut siunnersuusiuleruttorpoq – suliamilu taassumani atuartut ilinniartitsisullu peqanngittarneri pillugit paasissutissat aamma ilanngunneqarsinnaassapput.

Meeqqat atuarfianni paasissutissanik eqiterinissamut siammarterinissamullu inatsisitigut tunngavissaqareermat Naalakkersuisut siunnersuut itigartitsissutigineqassasoq inassutigaat. Naalakkersuisulli siunnersuutip ilaanut - tassalu nittartakkamik atoruminartumik paasissutissanik siunnersuummi kissaatigineqartunik ilaatigut imaqarsinnaasumik pilersitsisoqarnissaanut tunngasumut siunnersuuteqartoq isumaqatigaat. Ilinniartitaanermut Naalakkersuisoqarfimmeersut taamaattumik Nunatsinni Naatsorsueqqissaartarfimmeersut oqaloqatigerusuppaat meeqqat atuarfianni pissutsit pillugit paasissutissat naleqquttut ullutsinnut tulluunnerusumik ajornannginnerusumillu innuttaasunit amerlanerusunit atorneqarsinnaanngortinnissaat siunnerfigalugu.